

July  
2017



# KRISTIAN THALAI

thlen  
chin  
atanga  
HMASAWN

Vol. VIII No. 5

Kristian Thalai Pawl Chanchinbu thla tin chhuak



17th NEICCYA Biennial Conference @ Diwon



Lamchhip Branch Diamond Jubilee



Hlimen Bial Leadership training



Reiek Bial Leadership training

## *Kristian Ṭhalai Pawl chanchinbu thla tin chhuak*

**1970-a chhuah ṭan ■ Kum 47-naa vawi 7-na ■ Chhuah tawh zat : 464**

**Editor :**

Lalchhuanliana

**Joint Editors :**

Lalhnehzova

Lalfamkimi

Lalmuanawma

Dr. David C. Vanlalfakawma

**Manager:**

Lalmuanpuia

**A lak man :**

Kum khatah - ₹ 80.00

Copy khat - ₹ 7.00

*Thu chhuah tūr nei chuan Editor,  
Kristian Ṭhalai, Synod Office-ah thawn  
tūr a ni a; a la duh chuan KṬP Office-ah a  
man pēk lâwk a ngai.*

**Office Phone : 9436142398**

**E-Mail :**

[kristianthalai1970@gmail.com](mailto:kristianthalai1970@gmail.com)

[centralktp@gmail.com](mailto:centralktp@gmail.com)

### KRISTIAN ṬHALAI PAWL

**Thupui**

Rawngbawl tūra chhandam

**Thupui innghahna**

Ephesi 2:10. Thil ṭha ti atán  
Krista Isuaah chuan siama awmin,  
ama kutchhuak kan ni si a, chu thil  
ṭha tih chu kan awmna tūrin  
Pathianin a buatsaih lâwk a ni.

**Thiltumte**

1. Isua Krista rinna leh amah anna  
kawnga ṭhalaite hruai.
2. Kohhran kutke ni tura ṭhalaite  
buatsaih.
3. Kohhran hnathawh tihputlin.
4. Krista Chanchin Ṭha puan  
darh.

## A CHHUNGA THU AWM

|                                                              |    |
|--------------------------------------------------------------|----|
| 1. Editorial                                                 | 2  |
| 2. I Pathian tawh turin inpeih rawh                          | 3  |
| 3. Kritikal Kristian – Kristiante hi ‘critic’ ṭha kan ni em? | 8  |
| 4. NEICCYA Biennial Conference vawi 17-na report             | 12 |
| 5. Hmuh Theih Loh Pathian                                    | 16 |
| 6. Isua Krista hi i kheng bet nawn leh dawn em?              | 20 |
| 7. <b>Work Camp report</b> : Gurudayalpur                    | 23 |
| 8. <b>Hringlang tlang</b> : Ka pa thurawn min pek            | 24 |
| 9. <b>Rimawi</b> : Reh, Ri leh Music                         | 25 |
| 10. <b>Kantu</b> – Kelsih Branch                             | 29 |
| 11. Keimahni                                                 | 31 |



## CHHINCHHIAHNA

Ṭhalaite hian kan mi mal nun ṭheuh han inen ta ila, chhinchhiah emaw, chhinchhiah bik emaw nih chu nuam kan ti em em vek a. Hei hi khawvel thilah pawh a danglam a, a ṭha lam a nih pheih chuan kan lawm takzet ṭhin a ni. Chhinchhiah bik nih hi a hlut ṭhin em avangin, chumi duh chuan ṭhalaite pheih chuan kan hun tam ber kan hmang ta em maw tih mai tur a ni.

Chhinchhiah kan duhna kawng hi han chhut chiang ta ṭheuh ila, ‘An chhinchhiah bik che, i chetzia an thlir, i sawi apiang an ngaithla,’ tih hla nen hi chuan a inpersan leh viau si em? Thiam bik, mawi bik, nalh bik, zei bik, ṭha bik nih duhna avang hi a ni deuh zel zawk lo maw? Chhinchhiah bik nih duh avangin ṭhalaite hian khawvel ropuina kan um nasa em em a, ‘Hei chu a pawl lo’ aṭanga bul ṭanin, a lian tial tial a, a reiah chuan Lal Isua chhinchhiahna kan neih tawh sa chu khawvel ropuina hmang hian kan thai bo fo va, khawvel mawina kan thlakhlelh avangin Kristian ṭhalai inti ve siin khawvel mite hian an taah min ngai tho tho ṭhin a ni.

Kristian ṭhalai tam tak hi – mi bum hmang, sihnip, zu ruilh hmang, ai upa zah nachang hre lo niah mi tam tak chuan min chhinchhiah a, Pathianin ṭhalaite hi nungchang mawi taka awm turin min din a ni tih hi kan ngaihtuah duh hauh lo va, kan Kristian dan lah nu leh pate Kristian an nih avang chauhva Kristian, Setana lawm tawh chauhva Kristian em maw tih mai tur kan ni.

Chhinchhiah bik nih duh vanga hun tam tak kan hmang a nih rau rau chuan inngaihtlawmna te, thilphalna te, khawngaihna te, hmangaihna te hian i inthuan ang u. Heng hmang hian miten min chhinchhiah sela, mi tin – a lian a te, a hausa leh a rethei pawhin heng hi kan inhmeh vek a ni si a.

Lal Isuan, “Tu pawhin mi zui a duh chuan mahni hrehawm pawisa lovin, ni tin a kraws puin mi zui rawh se,” a ti. Ni tin a kraws pua Lal Isua kan zuina kawngah hian hrehawmna a awm ṭhin, channa a awm chang a awm bawh a, tuarna pawhin min hmuak fo ṭhin a ni. Chung thil chu a lo thleng a nih pawha Krista vanga huaisen taka hmachhawn ngam, amah zui ngam, chan ngam, tuar ngam nihna hi a ni Kristian ṭhalaite chhinchhiahna chu.

## I PATHIAN TAWK TURIN INPEIH RAWH

(Ephesi 2:10; 2 Timothea 4:5)

— H. Zonunsanga  
Kolasib Venglai Branch

Amosa 4:11&12 *“Lalpa thuchhuak chuan a ti. Chuvangin, aw Israel, i chungah hetiang hian ka ti ang: i chungah hei hi ka tih dawn avangin, aw Israel, i Pathian tawk turin inpeih rawh.”*

**K**um bul han thlir ila, heti tak maia chhiatna kan tawng nasa hi Kristian thalaite hi Pathian tawk tura kan inpeih a hun takzet a ni. Hma lam hun hre lo chung hian eng tikah emaw kan nun hi a la tawp ngei dawn a, chatuan rorel a nung chungah hma-chhawn thei lo hringfate hi eng nge kan dinhmun ni le? Lal Isua Court-ah thiam kan chang zo ang em? Van mipuitena an bail theih loh Krista court-ah hian eng thu nge kan sawi dawn le?

Pathian khawngaihna te, hmangaihna te kan sawi kur dup a, kawngka zima lut tur erawh leia kan nun dan

hmanga teh tur a ni dawn, a khawngaihna chang tur chuan keimahni theuh hi kan pawimawh, inthawh kep theih a ni lo. Vawiina kan nun dan theuh hi Lal Isua hmaa thu sawi turin a tling tawk em? Chu chu kan infiah ngam hi a va ngai em! Nat lawkna em em nei lovin kum bul atangin an liam thut a, “A va mak em aw...a nat awm pawh ka hre si lo...” kan ti liam mai a, keini ngei pawh hi mak ve thei dinhmunah hian kan ding reng a ni tih hi kan ngaihtuah tel ngai em? Naktuk a lo thlen apiang hian chatuan rorel hmachhawn kan hnaih zel a ni tih kan ngaihtuah tel ngam a ngai. Kan châk zawngte ngaihsak viauva, Lal rawngbawl hna kan phak tawka thawh tur awm kan hlamchhiah leh a nih si chuan Lalpa a lawm ang em? Khawvel hun hmawr tawhzia kan hria, Mizoram han thlir ila, thihna hrang

hrang thawm hriat tur a awm reng a, kan hun a thlen hun tur kan hre lo, hriat lawk loh laka lo pawngpaw thlamuan ve ngawt hi thil dik a ni ang em? Mahni nun ching fel hmasa chung a thlamuanna dik neitu Kristian Ṭhalai Pawl member i ni zawk ang u.

Ṭhalai kan ni a, social media pawh nuam kan ti tlang viau, kan hlimpuiin zan rei tak thlengin kan menpui a, kan phone battery a tlakhniam hlek chuan charge-na tur kan zawng a, current a lo awm loh phei chuan kan buai titih mai ṭhin. Chutiang deuh chuan kan nun pawh hi charge ve ṭhin a ngai a ni, charge-na tur a awm loh lai a awm ve lo, kan tan a inhawng reng a, kan nun battery tam lai leh tlem lai pawn ani chu charge nan a tlak reng a ni. Lal Isua lamah kan nun hi charge tel fo ṭhin a va pawimawh em! KṬP member ni chung a KṬP Day hre lo, Valentine's Day hre chiang viau lawi si nih hi a famkim lo. Ni tin mai hi Krista min Valentine's Day a ni zawk. A hmangaihna ngai renga min

hmangaihtu hmangaihna tluka hlu a awm chuang lo. Kristian ṭhalai tu nge i ngaihzawng? Amah buaipui hman lo lek hian i ngaih-zawng i lo buaipui ṭhin lo maw? Buai-pui tham lutuk loh buaipuiin kan nun hi a hmanhlel a, buaipui tham hmangaihtu tluantling Lal Isua hi i buaipui zawk ang u. Social media hmanga inkhual-telemna hian kan nun te hi a chhah buai tam ta lutuk a, hria nih kan chak a, bengvar viau kan tum a, Pathian ringlomite nen kan in awm pawlh nuai tih hre chungin tuipui dan tawk i thiam ang u. Hei hi hmelmapiin thangah a hmang hlauh thei a ni tih hriain, a chin tawka khawih dan kan hriat a ngai.

KṬP-ah kan inhmang a nih chuan rawngbawlna peng hrang hrang kan chelh ṭhin a, kan tih tur ṭha tak leh thu awih taka kan puitlinna hi Krista lawm zawng leh a duh zawng a ni. A rawngbawlna pengah hian te lua a awm lo va, kan phak tawk zela ṭhahnem kan ngaihna hi a hmaa thusawi la tinuam tur a ni dawn. Kan

rawngbawlna te, kan  
 thahnemngaihna te hi Krista  
 vang ni zel rawh se. Krista tel  
 ve a rem lohnaah chuan tel lo  
 ngam zel zawk ang u. Buai te  
 hi kan inti tlang lutuk em aw?  
 Buai tak chung pawha  
 remchang insiam thiam te hi a  
 ni zawk asin mi tangkai kan tih  
 thin. Lal Isuan a zirtirte a koh  
 lai khan, "Ani chu a awm mai  
 mai a, a hman dawn hi," a ti  
 lo, an len den lai te an kalsan  
 zawk a ni. Rawngbawlna  
 kawngah pawh a ni – "Ani  
 chu a buai lo, nilengin TV a en  
 hman a, Group Leader-ah i  
 ruat ang u," kan tingai lo. "Ani  
 nge nge hi a rin tlak thin, tha  
 taka ti thin a nih kha maw!" ti  
 chungin an ruat leh mai thin.  
 Kan ngaihtuah thiam em aw?  
 Kan buaina tam zawkah hian  
 Krista tel rawh se. Khawvel  
 thila buai lutukna hian kan  
 nun a ei chhiat i phal lo vang  
 u. Phone man to deuh  
 ringawt, biak ina a neitu hmel  
 hmuh tur awm chuang lote  
 phone hi chu a to famkim thei  
 lo. Kan phone te hi kan rinna  
 tihmelhem thei a ni em?  
 Chhandamna free, upgrade  
 ngai lo version thar ber min  
 pek reng laiin internet free te

hi kan lo buaipui zawk ang e,  
 thilthlawnpek hlu ber Fapa  
 hmanga chhandamna hian  
 kan nun kaihruai rawh se.

Branch thenkhat chu an  
 vannei hle. Missionary an  
 awm nual a, Pathian thu zir  
 mekte an nei bawk a, hengte  
 hi rawngbawlna kawngah  
 chuan mi dangtena min teh  
 fona tur a ni. Member-ten  
 Pathianni tukah eng nge an  
 hmeh thin, signal an nei tha  
 em, tih lam a ni lo. An  
 member-te hi eng nge  
 rawngbawlna kawngah an  
 thlen chin tih te hi min tehna  
 a ni zawk. Thil siam zawng  
 zawng hnena chanchin tha  
 hril tura mawhphurhna pek  
 kan nih angin Lal rawngbawl  
 hna thawk tura pen chhuakte  
 hian ngaihven an hlawh thin.  
 Missionary turin hmun  
 dangah kan kal vek thei lo;  
 nimahsela, awmhmuna phak  
 ang tawka kan lo tih vena hi  
 Lalpan a hre reng thin,  
 fellowship-a kan tawngtaipui  
 thinte tan hian a ram zauh  
 hna a lo thawkreng thin zawk.

Fak hla siamtu chuan,  
 'Khawvelah lawmna a kin fo,

a nawmna pawh a tawp, tiin a lo phuah chhuak a, a dik mang e. Khawvel hi kan kumhlun tur a ni lo, tuna kan kumah hian kum 70 belh ila a nawmna a va tawp chiang dawn em! Chumi zawh leha nun nuam famkim chên tur zawk chuan kan nun, kan thiltih, kan rawngbawl na hi i ngai pawimawh zel ang u. Chatuan rorel nia Lal Isua convict loh nih hi a va hlauhawm dawn em, eng anga mi ropuite pawh an insawi fel thei dawn si lo va. Min han bûk ang a, khawvela ka khawsak dan zawng zawng nen, a pawimawh ber chu Lal Isua hi i duh ber ang u. Kan thiltih tur pêng hrang hrang hian kan duhna tibo suh se, sum kan lak luhna kawng hian a hmel hliah suh se, kan thahnemngaihna apiang hi Isua tel ve duhna kawng ni zel rawh se.

Pathian tawk tura inpeih nun nei tur chuan kan rawngbawl naah kan chian a ngai. Mahni duh dan dana vei thuak thuak lam a ni lo. Rawngbawl tura chhandam thupaia innghat thinte tan

ngat chuan rawngbawl na hlen hi a pawimawh reng lah tak a, Rawngbawl na chu eng nge kan tih chuan mi dangte tâna thawhsak ti ila a dik ber awm e. Pathian tana kan thawhna kawng hi a kawkbik a ni. Rawngbawl na hlen tur chuan mahni inpek zawhna mai piah lama Krista râwn chungka kal hi a pawimawh viau awm e, engkimah fimkhur turin min chah si a. Rawngbawltu ropui ber Lal Isuan hringfate chhandama kan awm theihna tûra rawngbawl hna a thawh lâi khân, a thisen far tawp thlengin a inpe zo thak tih chiang takin kân hmu, nunna hlânin kan tân a tuar a ni. Kan rawngbawlsak thinte tan eng tiat chiahin nge thawhsak kan huam ve dawn? Rawngbawl na kawnga pawimawh ber mai chu Lal Isua la hre lote hnêna chanchin tha puan darh hi a ni awm e, chu hriat-tirna chu van kai nun silhfena inthumna kawng a ni.

Kristian thalai rualte tân chuan rawngbawl na tûr kawng hi a tamin, a inhawng zau hle a, kan member-pui

hmelmapa beihna sala tang mekte chhanchhuah hna thawh hi mahni tih turah kan inbel theuh theih chuan rawngbawlna tha leh hlu tak a ni âwm e. Rawngbawltu ropuite zin kawng hi khirhkhân tak tak a tam hle, chutiang bawkin thlemna tawk lo tura duan kan ni lo va, pal tlang thei tura Krista chakna hmanga buatsaih kan ni zawk tih hi kan vawn reng a pawimawh hle âwm e. Ephesi 2:10, Kristian Thalai Pawl chang innghahnaah chuan, “Thil tha ti atân Krista Isuaah chuan siama awmin, ama kutchhuak kan ni si a; chu thil tha tih chu kan awmna turin Pathianin a buatsaih lâwk a ni.”

Chu thil tha tih tura chu eng nge? Lal Isua la hre lote hnena chanchin tha puan darh hi rawngbawl tura, a buatsaihte tan chuan hna pawimawh ber a ni âwm e. He

hna tlin taka thawk reng tur chuan thawngtai a pawimawh viau mai. Pathian nêna kan inkar tha reng tur chuan kan hmachhuan fo tur chu thawngtaina hi a ni. Kan thiamna leh finnain a tlin loh chang pawha kan chakna hnar ni reng thin chu thawngtai thiltihtheihna hi a ni. Hmelmapa laka chhanchhuahna kawng hi kawng awlsam a ni lo, inbeihna hautak ber a ni. Kan Pathian chuan, “Thil tha tih tur hriaa, ti si lo chu a tan sual a ni,” a ti. Chuvangin, hre reng chungat isual thei kan nih loh nan kawng zawh tur kan thlan thiam a ngai viau mai. Mi dang tana malsawmna ni thei tur chuan a tha lam kawng hi kan zawh ngam a ngai a ni. Pathian tawk tura inpeih nun kan neih reng theih nan kan member-pui, sala tang mekte chhanchhuah kawngah thahnem i ngai ang u.



**HRIATTIRNA : KṚP General Conference Hla Bu 2018 atan KṚP Office-ah July ni 17, 2017 thlengin hla theh luh theih a ni a. Hlate hi harmonise saa theh luh ni se, a phuahtu chanchin tawi leh hla phuah chhan tawi theh luh tel ni bawk se.**

## Kritikal Kristian

### – Kristiante hi ‘critic’ tha kan ni em?

— *Lalremruati Khiantge*  
*KTP, Kulikawn Branch*

**R**e thupui ‘Kritikal Kristian’ tiha ka rawn dah hi a Sap tawng chuan ‘Critical Christian’ tihna a ni mai a. A Mizo tawng taka dah dawn chuan Pu L. Keivom ziaak dan ang takin “Kritikal Kristian” tih te pawhin a dah theih awm e. A thumal ‘Kritikal’ tih hi Sap thumal ‘Critical’ emaw, ‘Critic’ tih emaw aṭanga lak a ni a. Chumi awmzia chu – mi lehkha ziaak emaw, artist-te thiltih endika sêltu tihna emaw a ni ber a. Entir nan, film chhuak thar apiangte lo ena, a hmuhnaawm leh nawm loh thu tehna hrang hrang hmanga ziaka sawi ṭhinte an ni. Film siamtute tan heng ‘critic’-ho hi a chang chuan an hnawk duh ṭhin hle reng a ni. ‘Critic’ zingah awmze nei tak leh zahawm taka endik ṭhin an awm laiin, a tam zawk chu sawisel peih hrim hrim an ni. Chung mite chu film siamtute tan an ngeiawmin, an film

tihmingchhetute pawh an ni thei hial awm e.

Keini Kristiante pawh hi kan ni tin nun, kan rawngbawlinaah hian ‘critic’ kan lo ni ve thei reng mai a. ‘Critic’ ṭha nge kan niha ‘critic’ ṭha lo tih erawh kan inzawh fo a ṭul ngei ang! Kan Kristianpuite kan va endik ang hian keimahni lam hi endik kan cho ve em? Mi thusawite leh an chetziat kan lo thlirin, kan lo en chîkin, eng nge an sawi leh dawn a, an tih leh dawn tih chângin kan lo inring reng ṭhin lo maw?

Tirhkoh Paula pawh kha a hun laiin, Korinth khuaa mi ṭhenkhatin an lo sawisel nasa hle a, an sawiselna tam zâwk chu hetiang hi a ni:-

1. Paula lehkhathawnte chu a khauh va; mahse, a takah a âwmnêm a, a tawng pawh a sitawm (2 Korinth 10:10).
2. Paula kha hruaitu ṭha a ni lo, lamhla aṭang chauhvîn a huai, a takah chuan a nêm leh duai (2 Korinth 10:10).
3. Paula kha thusawi a thiam lo (2 Korinth 10:10).
4. Paula kha a rinawm lo (2 Korinth 1:17).
5. Paula khan Korinth kohhran aṭanga suma ṭanpuina a lak duh loh avangin an ngaih dan a ni lo

(1 Korinth 9:1-10).

5. Korinth kohhran kha Paula kaihhruaina hnuaiah khaw dang kohhran aiin a theuneu zâwk (2 Korinth 12:13). Paula kha tirhkoh ni turin a tling lo (2 Korinth 11:5).

A chung a tar lan ang hian Paula khan sawisel a hlawh nasa ve hle a. An sawiselnate hi en ta ila, a dik chiah em? Hetia insawisel vak vak hian inpumkhatna a tichhe thei hle a, kohhrana kan rawngbawlna pawhin harsatna a tawh nasa thei hle.

Tun hun hi lo en ta ila, ringtute hi Korinth khuua mite ang hi kan lo ni ve mai em? Mi tihsual châng reengin kan khawsa em? Bible-a kan hmuh angin Pharisaite pawhin Lal Isua leh a zirtirte tihsual châng reengin an mit leh beng an lo chhit thin kha! Mizo ringtute zingah pawh mahni thuthmun atanga sawisel thiam kan tam hle. Khawvel thiamnate lo sangin, social networking site-ah te 'armchair critics' kan tih mai, mahni thuthmun atanga sawisel thiam em em, a taka an sawi anga thawk tha thei chuang lem lo kan tam ta tial tial mai chu a ni e. A sawia sawi thiam mai ni lo, a sawia sawisel thiam; a tiha tih ni lo, a tiha

tihnawh thiam kan tam ta hle. Matthaia 12:30-ah chuan, "Tu pawh ka lama tang lo chu mi do a ni; tu pawh mi lâk khâwmpui lo chuan a tidarh a ni," tih kan hmu a, kan sawisel ringawta, a siam that lam kan thawh si loh chuan, a tidarhtu mai kan ni tih a Chiang hle. Khawvela kan awm chhung chuan mihringin harsatna leh duhtusam lohna kan nei ngei ang; mahse, kan dinhmun theuhva kan lungawi lohna (problem) a awm chuan a siam thatna (solution) erawh kan zawng ngei tur a ni. A 'committee'-a tel si lova, kan lo sawisel vak vak te hi a fel ber lo mai thei e. Thil tha zawk leh tih dan tha zâwk kan hria a nih chuan inhrilh tawn mai hi a fuh zawk hmel. Hnam changkâng zâwkte tih dan lak pawh hi a tha zawk lawm maw ni le ka ti thin. Hmaichhanah an inhrilh pawp mai a, a hnuleha sawi chhun-zawm vak tur a awm tawh chuang lo va, rilruah an pai reng tawh lo a ni. Taksa leh thlarau hriselna atan pawh hetiana tih chin hi a that zâwk ngei a rinawm.

Ringtute hian mi dang kan va sawiselna ang bawh hian keimahni leh keimahni hi insawisel emaw, inbih Chiang

ngam ta zawk ila, kan thlarau nun tan leh ni tina kan nun kawngah pawh hma kan sâwn ngei ang tih ka ring tlat. ‘Critic’ tha ni tur chuan mahni kan inman chian hmasak a tul awm e. Bible pawh hian mahni inbih chianna (Self introspection) hi a lo ngai pawimawh hle ni tur a ni, hmun tam takah kan hmu a, hetiangin:-

### **Thufingte 21:2**

Mi tin awm dân hi mahni mitah chuan a dik tih a ni a;  
Nimahsela, Lalpan thinlung a buk thin.

### **1 Timothea 3:9**

Chhia leh tha hriatna thiangan rinna thuruk chu pawm mi an ni zâwk tur a ni.

### **Galatia 6:3-4**

Mi, eng mah ni si lovin, mi lian deuhva a inruat chuan mahni a inbum mai a ni. Mi tinin mahni thiltih fiah theuh zawk rawh se, chumi hunah chuan mi dang chung ni lovin, mahni chung chauhvah chhuan tur a nei ang.

### **2 Korinth 13:5**

Rinnaah chuan in awm emaw, nangmahni ngei inchhin thin ula; nangmahni ngei infiah thin rawh u.

Ringtute chu kan ringtupuite dâwm kângtu tur kan ni a, kohhranah pawh kan inñanpui tawn dial dial tur a ni. Pathian duh dan lova thil tisualtute chu hmangaihna nena an thatna tura kan thunun a nih si loh chuan, kan lo ngaimawh viau a, kan lo sêl vak hian awmzia a nei thui awm lo ve. Rom khuaa mite hnenah heti hian Tirhkoh Paula chuan lehkha a thawh a, “Chuvangin, i insawisêl tawh suh ang u, tu pawhin mahni unau dâl na emaw, tlukna emaw siam loh tum zawk rawh u.”

Rom 15:1-2-ah chuan heti hian Paulan a sawi leh a: “Chutichuan, keini mi chakte hian mahni lâwmna zawng lovin, mi chak lote chak lohnate chu kan tuarpui zâwk tur a ni. Mahni vêngte tihsâwt nan an thatna turin tihlâwm i tum theuh ang u.”

Jakoba 4:11-12-ah heti hian kan hmu a: “Unaute u, insawichhe tawn suh u. Tu pawhin a unau a sawichhiatin emaw, a unau a sawisêlin emaw, dân a sawichhiain dân a sawisel a ni; nimahsela, dân i sawisêl chuan dân zâwmtu i ni lo va, rorêltu i ni zawk e. Dân petu leh rorêltu pakhat chauh a awm, chhandam theia tiboral theia chu. Nang,

thenawmte sawisêltu chu tu nge maw i nih le?"

Matthaia 12:35-ah chuan heti hian kan hmu leh a: "Mi tha chuan a ro bâwm tha ata thil thate a theh chhuak thin a, mi sual chuan a ro bâwm chhia ata thil chhiate a theh chhuak thin. Tin, ka hrilh a che u, miten thu lawilo an sawi apiang, chung thu chu rorêl niah chuan an sawi fiah a la tul ang. I thu chuan thiam a chantîr ang chia, i thu vek chuan thiam loh a chantîr bawk dawn che asin."

Mi dangte dik lo taka kan hêk emaw, kan sawisêl vak vak emaw hian mahni mawng hlim mai kan ni a tih theih awm e. Rorel niah chuan kan tehna ngai bawkin min la teh vek dawn si a. Chuti taka mahni leh mahni kan inbih chian theih chuan, mi dangte kan hre thiamin kan ngaidam thei dawn a lo ni a. Kan zui ber Lal Isua hian mi dangte ngaidam thei turin min fuih nasa hle a. Ngaidamtu dinhmun hlu tak min neihtir te hi kan ngaih pawimawh thiam chu a tul hle ang.

Rang taka mi dang thil tihsual kan va dem vak hian Lal Isua lâwm zâwnng a nih a rinawm lem lo. Ringtute berin

mi dang kan ngaihdam theih tlat loh chuan, tu nge maw ngaidam chuang ang le? Matthaia 7:1-5 a kan hmuh angin, keimahni tihsual leh tlin lohna hi chu kan hmu mawh duh khawp mai a, mi dangte tlin lohna chhe te erawh chu kan hmu zung zung lawi si.

Lehkhaziaktute leh Pharisaï vervêkte ang khan pâwn lamah kan lo duhtui viauvîn, mi dangte kan lo hmu tling lo viau thei a; mahse, keimahni thinlung chhungril berah chuan vervêkna leh sualnain kan lo khat reng thei a lo ni. Kan Lal Isuan lehkhaziaktute leh Pharisaï vervêkte a hauhna kha hre reng ila, "Nangni hruaitu mitdel, thosi thli faia sa-nghawngsei lem si thinte u!" min tih loh nân Lal Isuan dân thu pawimawh zawk a tihte – felna te, khawngaihna te, rinawmna te chu ngaih pawimawh zawk i tum theuh ang u! (Matthaia 23:23-27)

A tawp berah chuan keini Kritikal Kristiante hi 'critic' tha – 'Ngaidamtu Kristian', mahni leh mahni inbih Chiang Ngam Kristian kan nih theuh theihna turin Lalpa Thlarau Thianghlim chuan mal min sawm theuh rawh se.

# NEICCYA BIENNIAL CONFERENCE

## VAWI 17-NA REPORT

A hun : May 19-21, 2017

A hmun : Diwon Presbyterian Kohhran,  
Ribhoi Dist., Meghalaya

– Lalremsanga Khiangte  
Bazar Veng Bial, Lunglei

**NEICCYA Biennial Conference vawi 17-na** chu Diwon Presbyterian Kohhran, Ribhoi Dist., Meghalaya-ah May 19-21, 2017 chhung khan neih a ni a. NEICCYA hi kum 1993-a din a ni. President hmasa ber chu Rev. J. Houplien Neitham (CHT Synod) a ni a, Secretary hmasa ber chu Dr. Laltluangliana Khiangte (Mizoram Synod) a ni. NEICCYA BIENNIAL CONFERENCE hi India hmarchhak lama awm Kristian thalai pawl hrang hrangte intawh khawm hun, inkhawmpui a ni deuh ber. Unit 19 aṭangin palai 365 kan kal a. Executive Committee member 11, invitee 3, kan vaiin mi 379 kan ni. Tun tumah hian KṭP (Mizoram Synod aiawhin) palai mi 52 (Central KṭP Committee aṭangin mi 14 leh Bial aiawh mi 13, leh Synod Choir member 25) kan kal a ni.

**Kalkawng :** May ni 18 (Ningani) zanah palai kal turte Synod

Office kawtah kan innghak khawm sap sap a. Mission Veng Branch KṭP-in thingpui leh a hmeh tui tak min lo siamsak a, a lawmawm hle. Kal tur kan kim hnu chuan Rev. F Lalrinnungan (Mission Veng Bial Pastor) ṭawngṭaina hun a hmang a. Dar 7:35 pm-ah Synod Office kawt aṭang chuan bus-in kan kal ta a ni (Central KṭP Committee thenkhat leh Synod Choir te erawh May ni 19, 2017, Zirtawp zanah an lo kal thung). Bualpuiah zanriah kan ei a, a thenin thingpui an in bawka. Zing lam dar 2 velah Silchar tluang takin kan thleng a. Khaw lum tiziaawm turin malsawm ruah a tla cherh cherh bawka. Zing dar 5 bawr velah chuan Silchar leh Kalain inkarah kan motor a Chiang ta tlat lo mai. A ṭhat leh mai ringin kan hruaitute nen ruahsur hnuaiah bus chu kan han nam tlauih tlauih va, kan rin ang a ni ta hauh lo mai! A part pakhat, head gusket a kang niin

an hria a, diesel leh engine oil-te chu a lo inpawlh vek tawh a. Ruahsur hnuaiah chuan khua kan nghak var ta a.

Dar 6 velah Kalain mechanic a lo thleng a; tichuan, workshop lamah kan lut ta a. Thingpui kan han in a, rei tak kan nghah hnu chuan Injector a lo chhia a, driver-ten Silchar lamah keng pheiin keini lam chu tukthuan ei turin dar 10:30 am velah Kalain lamah kan pheii a. Khaw lum hnuaiah kan chawlhna hotel leh a bul velah chuan kan tei kan tei mai a. Tlai lamah pheii chuan chawke ni rui ang maiin kan meng deuh hu tawh mai a. Nilenga kan nghah hnu chuan tlai dar 6:15-ah kan bus chu a lo thleng ta. Kan han lut nghal sap sap a, Kalain pawh chu kan chhuausan ve thei ta a ni. Tuang taka kan kal laiin Lailapur kan pelh hnu dar 9 velah popular serve a lo chiang leh lo va. Darkar khat dawn kan han siam tha leh rih a. Tichuan, zan dar 10:30-ah Ladrymbai thlengin zanriah kan ei a. Chuta tang chuan tuang taka kal zelin Diwon chu Inrinni zing dar 4 velah kan thleng a, motor-ah khua kan nghak var leh a. Dar 6 velah khaw chhungah lutin Diwon kohhran thalaiten min lo hmuak a. Mi pahnih zela thleng dunin mahni thlen in theuh kan

pan ta sap sap a. Kan zin kawngah hian kan tuang lo viau nain, han vui deuh leh lunghnur deuh kan awm lo va, kan hlimin kan nui tlang dar dar thei zel a, a lawmawm hle a ni.

**A hmun :** Diwon khua hi Ribhoi District, Meghalaya-a awm a ni a. Dist. Headquarters, Nongpoh atangin km. 27 (darkar 1 leh a chanve vel kal) a ni. Guwahati lam a hnaih deuh tawh avangin a lum phian mai a. A lum zawng hi kan cham chhung hian degree celsius 26-30 (?C) inkar a ni tlangpui. A khaw hmun erawh a rem em em a, boruak a thengthaw nuam em em baw. A mi chengte hi Bhoi hnam deuh vek an ni a, Khasi tawng leh Sap tawng an hmang deuh ber. Presbyterian Kohhran hlang awmna khua a ni. Kum 2011 chhiarpaia an chhinchhiah danin in 216 a awm a, mihring 1,305 (m-622, h-683) an awm. Tunah hian Diwon Kohhranah hian mi 1,333 an awm a. Danzawhkim 580 an awm mek a, Kohhran Upa (Active) 7 an awm mek baw. Mikhual thlen an thiam em em a, eng tik lai pawha ei tur kuaih (Kuhva) hi min chhawp reng baw a. Tin, ei leh inah min duhsak em em a, a inthlahrun-awm mah zawk a ni.

**Rorel Inkhawm leh Reports :** May ni 19, 2017 (Zirtawp) zan, motor lam chian loh avangin kan thleng hman ta lo va. A tuk Inrinni chawhma inkhawmah Unit hrang hrang hnen aʔangin rawngbawl na report (June 2015–May 2017) hrang hrang ngaihthlak a ni a. Unit 33 zinga Unit 17 hnen aʔangin report ngaihthlak a ni. Tun dinhmunah hian Unit 33 (Kohhran ʔhalai) leh Associated member 7 an awm mek a ni. Rorel inkhawm hi NEICCYA President, Rev. Eleazer Sanglyne (Jingiasem Samla, KJP Synod Mihngi) -an a kaihruai a. NEICCYA Executive Committee thu, floor-a chhawp chhuahte ngaihtuah a ni.

### **Thurel tlangpuite:**

1. NEICCYA Silver Jubilee lawm dan tur programme ruangam, EC-in a ruahman chu a thuphunga pawm a ni a. Hruaitu tharte bawhzui tura dah a ni.
2. NEICCYA President kal chhuak, Executive Committee-a term khat ʔhut chhunzawm (Ex-officio) rawtna, EC aʔanga lo lut chu remtih a ni a. Tun term thar aʔanga hman nghal tur a ti h a ni.
3. Kum 2017-2019 NEICCYA Budget atan Rs. 5,99,000 pawm a ni a. KTP (Mizoram Unit) tum

turin Rs. 36,500 (NEICCYA Target Rs. 27,500 + Silver Jubilee Fund Rs. 9,000) ruahman a ni bawk.

4. KTP, Mizoram Unit aʔanga thulut – Hmarchhak biala hnam chi hrang hrangte zingah remna leh muanna a awm theihna tur leh kohhran inpumkhatna a awm theihna tura hmalak kan rawtna chu NEICCYA EC-in a bawhzui tura dah a ni bawk.

5. Kum 2019 NEICCYA Bien-nial Conference vawi 18-na chu Prebyterian Independent Church, North East India (PICNEI)-in a thleng ang a, a hun tur leh a neihna tur kohhran hi EC lamin a thlengtu Unit te nen inbe rawn chungin a ruahman ang.

Heng bakah hian human trafficking chungchang te, remna leh muanna a awm theihna tura hmarchhak biala ʔhalaiten nasa zawka tha kan thawh theih dan tur kawng dap te, NEICCYA hnuaia kohhran pawl hrang hrang ʔhalaite Joint Fellowship neih te remtih a ni a, NEICCYA EC-in a bawhzui tura dah a ni bawk. Kum 2017-2019 chhunga NEICCYA hruaitu thar tur thlan nghal a ni a, hetiangin:

*President :* Mr. H. Lalthangliana  
(MʔKP, BCM)

*Vice president* : Rev. A.I. Khat-shing (Jingiasem Samla, KJP Synod Sepngi)

*Secretary* : Rev. Salem L. Hmar (CKTP, EFCI)

*Asst. Secretary* : Rev. Jubilee-thang Hrangchal (PYF, CHT Synod)

*Treasurer* : Rev. Khawbrok Rympei (Ribhoi Synod, EU Union)

*Finance Secretary* : Mr. Dr. David C. Lalfakawma (KTP, Mizoram Synod)

**Worship Programme** : May ni 20 (Inrinni) zanah D.U.Y.A. Auditorium-ah variety programme hman a ni a, unit hrang hrang aṭangin solo, group zai, leh zaipawl ngaihnaawm tak tak leh thiam tak tak ngaihlak a ni a. KTP, Mizoram Synod aiawhin Shillong Bialin Special Item (Band) an ti baw.

May ni 21 (Pathianni) chawhma inkhawmah inkhawmpui thupui 'Dare to Stone Alone' (Daniel 1:8, Mahnia din ngam) tih chu Rev. Lianchhunga Khiangtein (TKP, Mizoram) a sawi a. Zaipawl hrang hrang zai ngaihlak a ni baw a, Synod Choir te pawh an zai thiamin an zai ngaihlak a nuam leh hle baw. Chawhnu inkhawmah Rev. B.R Sohkhia (Church of God) hnen aṭangin thupui kan

ngaithla leh a, zaipawl hrang hrangte an zai baw a. An zai thiam hlawmin, an zai a hmuhnaawm thei hle baw. Inkhawm ban hlaah, 'Ro hlu ka nei lawmna thuruk' tih hla kan sa a, a nuam dangdai ve hle. Zan dar 7-ah inkhawm kan ṭan leh a. Tv. Robert Lalduhzuala, CKTP Committee member-in ṭanna hun a hmang baw. Rev. R. Lalnunzira, Secretary, NEICC-in Pathian hnenah hruaitu tharte a hlan a. Tin, zaipawl ngaihnaawm tak tak zai ngaihlak leh a ni a. Rev. Eleazer Sanglyne-an valedictory sermon a sawi baw.

**Haw lam** : Pathianni zan inkhawm banah haw turin kan insiam nghal sang sang a, kan thlen inten kan haw kawnga kan rilṭam hlauvin, chaw leh artuite min funtir hlawm baw a. Tichuan, zanlai pelh hret, dar 12:15 am-ah Diwon khua chu kan chhuahsan ta a ni. Chawhma dar 11-ah Mizoram House, Silchar thlengin, tukṭuan te kan ei a. Hruaituten bazarna hun te an siam a; tichuan, chawhnu dar 2-ah lo chhuak lehin, zan dar 11-ah tuang takin Aizawl kan thleng leh ta a ni.

# Hmuh Theih Loh Pathian

— Rev. K. Laltlankima  
Serampore College

**S**aphovin "Seeing is believing" an tih mek lai a 'hmuh theih loh Pathian' chungchang lo sawi chu tunlai finna leh mihring rilru putzia nen chuan thil inkawkalh takah a ngaih theih awm e. Mahse, mihringte ngaiha thil inkawkalh tak mai hi Pathian thuah chuan a inhne rem thei tlat si. Hei hi Pathian thu hlutna leh ropuina tam tak zinga pakhat a ni.

**Hmuh theih nge hmuh theih loh? :** Bible-ah hian, a bik takin Thuthlung Hluiah, Pathian hmuh thu a lang leh zauh thin. Jakoba'n hmaihma ngeia Pathian a hmuh thu a sawi a (Gen. 32:30), Lalpan Mosia chu inhmatawna a biak thin thu kan hmu bawk (Ex. 33:11). Mahse, a piah lawkah Lalpan Mosia hnenah, "Ka hmel zawng i hmu thei lo vang," a ti leh lawi si (Ex. 33:20). Mosia vekin mipui tana a jawngtainaah, "...hmaichhan

meuhvin an hmu tawh si chia..." (Num. 14:14) tiin a chham tel bawk. Enoka kha Pathian nen an leng dun thin tih a ni a (Gen. 5:24). "Leng dun na na na chuan a hmel hmuh awm tak a nia," tiin a zeldin theih bawk awm e.

A lehlamah Thuthlung Thar kan en chuan Pathian chu hmuh theih loh tiin a lo sawi ve leh bawk si. Entirna tlem han tar lang ve leh ila: Johana chuan mi tu mahin eng lai mahin Pathian an hmuh loh thu a ziak a (Joh. 1:18), Paula'n Timothea hnena lehkha a thawnah Pathian nihna hrang hrang a sawi zingah 'hmuh theih loh' a nih thu a sawi tel bawk a (1 Tim. 1:17). Paula vekin Kolossa khuaa mite hnenah Isua chu "...hmuh theih loh Pathian anpui" tiin a nihna pakhat a ziak lang ve leh bawk.

"Heng thute hi Bible-a inziak ve ve a ni si a, eng nge a awmzia ni ta ang le?" tiin ngaihtuahna seng buai viau pawh ni ila thil awm tak a ni. Mahse, "Bible hi a inkawkalh tlat mai. Bu khata khawr pum ni si, heti tak maia a chhung thu a inhmuh loh avang hian rin ngam turah ka ngai lo," tia ngaih dan siam erawh chu thil atthlak tak a ni thung ang.

**Inhmatawnnin, hmaihmaa inbia awmzia :** 'Inhmatawnnin' emaw, 'hmaihmaa inbia' emaw hian Pathian hmel an hmu tih a kawko lo. A hun laia an țawngkau-chheh pakhat ve a ni tih kan hriat a țul. Mizote pawhin țawngkau-chheh kan nei. Entir nan, 'ar chil zat' hi thil tlem sawina a ni. Ar chil zat chiah a ni tihna a ni kher lo. Thil lem tham sawi uarna a ni mai. Chutiang deuh chuan Bible-a inhmatawnna inbia emaw, hmaihma emawa inbia tih hi Pathian inpuanna dawngtute'n țum danga an dawn leh tawnhriat ngai loh danin, danglam takin tun țumah chuan Pathian inpuanna an dawn thu uar taka an sawina a ni. Tun țuma Pathian inpuanna an dawn hi a chiangin a fiah zawk em em a, țhian dun inkawmin zalen tak leh inhawng taka, eng mah zep leh i awm hauh lova, innel leh inpawh taka an titi dun melh melh anghian tehkhin a ni. Țum dangah chuan mumang lamah emaw, inlarna hmangin emaw Pathian a inpuang țhin a, tun țumah erawh chuan chutiang chu ni lovin, hai rual lohva chiangin, Pathian ngeiin an hnenah thu a sawi a ni tih sawi

nan he țawngkam "inhmatawnnin, hmaihmaah" tih hi an hmang țhin a ni.

Hei hi Bible ziaktuten inhmatawnna inbia emaw, hmaihmaa inbia emaw sawina atana an țawngkam hman awmzia a nih chuan, a ngial a nganin an tisa mitin Pathian an hmu lo tih a chiang tawh mai awm e. Chuti a nih chuan Bible chhung thu, a bikin Thuthlung Hlui leh Thuthlung Tharte hi a lo inkawkalh reng reng lo tih kan hre thei tawh ang. A inkawkalh emaw kan tihna chhan chu keimahni lam hriatna a tlem vang a ni tih pawh kan hre thiam tawh nghal mai awm e. Hei hian, Bible thu awmzia hre fiah tur chuan keimahni lam kan inchhiar zau ve hle a țul a ni tih min hrilh nghal bawk. Mi tam tak chuan hrilhfiahna bu chhiar lem lovin mahni hriat thiam dan danin kan hre thiam a, a zir mi leh chhui zau peilte thusawi chu 'rau' lo hleah kan ruat zawka. Chutiang ngaih dan chu a him lo hle tih kan thu chai lai hian a finfiah nghal bawk awm e.

**Hmuh theih loh hi rinhlelh tur a ni lo :** Kan Pathian hi 'Hmuh

theih loh Pathian' a nih avangin kan ringhlel tur a ni lo. Tunlai thiamna sang zawk hmanga thil an tehnaah chuan kan hmuh theih loh Pathian chu a awm ngei a ni tih finfiahna a awm lo va, chu vang chuan mi tam takin rin duapah an ngai. Finfiahna phutna khawvela cheng kan nih tawh miao avangin, chutiang ngaih dan chu miin a lo nei a nih pawhin 'a mawh lo ve' kan ti a ni mai thei. Mahse, heti zawng hian i han ngaihtuah teh ang – kan hmuh theih zawng zawng hi a tak a ni kher em? He zawhna hi Pathian chungchang bikah chuan "Ni kher lo" tia chhan ngai a ni. Hindu-hovin hmuh theih pathian an bia a, naupang-te pawhin pathian tak a ni lo tih kan hria.

Isreal fate hun lai pawhin an thenawmah hmuh theih thil pathiana be hnam eng emaw zat an awm. Eng emaw hun lai phei chuan Israel fate pawhin an be ve thin. Mahse, an hmuh theih avang ngawt khan pathian tak an bia tihna erawh a ni der lo. He thu hian keimahah chuan "kan hmuh theihthe ngei hi Pathian dik tak chauhva pawm tur a ni lo" tih a finfiah chiang khawp mai. Bible zirtirnaah

chuan thil hmuh theihthe hi dam chung at an mai a ni a, hmuh theih lohte erawh chu chatuan at an a ni zawk hlaui thung tih hria reng tur (2 Kor. 4:18).

**Hmu thei lo mah ila, Pathian tak a ni :** Kan Pathian hi hmu thei lo mah ila Pathian tak a ni. Chu chu engtin nge kan hria theih, kan tih chuan, a chhanna mawl te chu, "A aw kan hre thei," tih hi a ni. Kan Pathian hi hmu thei lo mah ila, a aw kan hria theih avangin Pathian nung ngei a ni tih a chiang. Thli pawh hi kan hmu thei lo. Mahse, a thawmah leh a hnathawh atangin a awm ngei a ni tih kan hria. Alehlamah hmuh theih pathian, pathian lemte hian atawngka chhuak an neih kan hre lo.

Kan Pathian hi a aw hmanga a inpuanna pia lamah a thiltih leh a hnathawh atangin a nung ngei a ni tih rinhlel rual a ni lo. Milem pathian, hmuh theih pathiant hian hnathawh an neih kan hre lo; thiltih an neih sawi tur pawh kan hre hek lo. Khaw lai kilah emaw chuan thil tih leh hnathawh nei angin an lo sawi ve mai thei e; mahse, kan Pathian ang hian mi nung an ni tih finfiah an dawl ngut ang emaw chu?

**Hmuh theih loh chu zuam kher**

**suh :** Kan Pathian hi hmuh theih loh Pathian a nih avang hian kan zuamin kan hlau lo mah mah, tih uar takin ka sawi duh. Kan hmuh loh avang hian 'khawi kipa awm' a ni tih hi kan pawm tak tak lo emaw tih mai turin kan òh lo hle a, kan hlau lo hle bawk. Tunlai òawngin han sawi ta ila, "Pathian hi kan 'care' lo khawp mai." Phuba lak hmang Pathian, kan ral hmang Pathian a ni tih kan hre reng chung pawh hian kan duhna leh chakna zawnah chuan kan pawisa lo òhin khawp mai. Kan velah a awm ve reng tih hre lo ni awm takin kan pal bawrh bawrh a, mahni kan inthiam chawp zel mai a nih hi!

Kan hmuh theih loh Pathian ai chuan kan hmuh theihte hi kan ngai pawimawh zawk fo. Harsatna kan tawh changte hian Pathian pun ai chuan tu emaw thiltitheih deuhva inngah kan thlang fo. Kristian kan nih angin Pathian han rawn loh chu fel lovah kan ruat a, a hming chauhvin kan rawn òhin emaw tih turin kan awm a. Kan inngahna bulpui atan chuan thil dang emaw, mi dang emaw kan thlang leh òhin.

**Tlangkawmna :** Pathian chu thlarau a ni a (Jn. 4:24), riruanga nei lo (Deut. 4:12). Chuvangin, a inlar pawhin ruangam hrang hrang a pu òhin. John Gill-a chuan, "Kan tisa mit leh hriatna thazam hrang hrangte leh finna hmangin Pathian hi hmu thei lo mah ila, rinnain kan hmu thei a ni," a ti. Mit lawnga kan hmuh theih loh avang hian a awm lo tihna a ni lo va, a nep ta viau ve tihna pawh a ni hek lo. A thawm leh sulhnu àngin a awm ngei tih kan hria a, rinnain kan nemnghet a ni. Rinna hi sawi nep tum tur a ni lo. Rinna thiltitheihna leh awmzia (Heb. 11:1) hi hriat thiam kan tum zawk tur a ni; rinna lovin beiseina takngial pawh kan neih theih loh hi.

*"Ka Lalpa hmu lo mah ila,  
Ka hnenah a awm reng fo va;  
A duh zawng thil ka tih laiin,  
Lalpa fakin a aw ka hria."*

*(KHB no. 153)*

[Rev. K. Laltlankima hi 2014 Synod Inkhawmpuiin Serampore College-a zirtirtu tura a dah angin Department of Theology and Ethics-ah he rawngbawh hna hi a thawk mek a ni. – Ed.]

## Isua Krista hi i kheng bet nawn leh dawn em?

—K. Remruatfela  
Upper Republic Branch

**R**um 2000 dawn kal ta khan Pathian Fapa mal neih chhun Isua Krista chu thi tura thiam loh chantir a lo ni tawh a. Chutih lai erawh chuan he thihna hi runthlak hle mah se, keini mihring suala boral turten nunna kan lo neih lehna hnar a nih miau avangin a tlante tan chuan Chanchin Tha a ni lo thei lo va. Chuvangin, a thih cham hriat reng nan 'Good Friday' tiin a hnungzuitute chuan urhsun takin hun kan hmang thin a ni. Isua Krista thiam loh chang tura thu rem a nihna hi khawvela law & order bawhchhiatna lian ber anga ngaih a ni a. Roman Jurisprudence leh Principles of Natural Justice kalh tlat a ni. Chung a kalhna langsar zual deuhte chu:

1. Sanhedrin Court tih tur leh hna chu mi, thil sual tia puhte lo venhim leh an lama lo tan tur a nih rualin a phiartuah an tang.

2. Thuhretu an zawng chawp hi a dik lo. Juda-te danah thubuai puluttu kha thuhretu a ni nghal tur a ni.

3. Hretu der an siam hi Juda-te dan kalh tlat a ni.

4. Hretu der chu hrem ngei tur a ni a. Mahse, a hremtu tur ngeite chu hretu der zawngtu an ni tlat.

5. Thihna khawp thubuai lian tham zanah rel phal a ni lo va. Isua chungthu hi Sanhedrin-hovin zanah an rel.

6. Court thutlukna reng reng, a ni la lain puan phal a ni lo va, a tuk an nghak tur a ni. Chu vang tak chuan Sabbath ni emaw, kûn ni dang emaw thlen hma ni chiahah thubuai rem awih a ni lo (Thuremna puan ni kha chawlh a nih dawn avangin). Isua case hi Kalhlen Kut Ni hma chiaha rel luih a ni.

7. Thihna khawp thubuai lian thamah intiamkamna neihtir a thianga lo. Kaiapha khan Isua kha thu dik chauh sawi turin a intiamtir.

8. Kaiapha'n ama mi mal kuta thubuiaia la lutuk leh puhtu lam (Prosecution branch) ang hiala a tang hi dan kalh a ni.

9. Thihna khawp sual lian

thamah reng reng chhantu lam ukilin a duhtawkin thu a sawi hmasa tur a ni a. Isua case-ah erawh hi chuan ukil an awm lo hrim hrim.

10. Court-ah judgment nua-pang lamin an sawi hmasa thin tur a ni. A chhan chu member upa lamte thusawi-in a hneh theih avangin. Isua thubuai remnaah hian a hotu lam chauh an tawng niin a lang.

Chutiang chuan kan Lalpa Isua Krista chu dik lo taka hek leh hrem a ni a. He a thihnaah hian a hun laia Rom sawrkar leh Juda mipuite chauh kha an inhnammawih lo va. Kan sual vang liau liauva thi a nih avangin keini mihringte pawh hi a thihnaah hian nasa takin kan inhnammawih a ni. Tunlai khawvelah a hringhranin Isua Krista hi kan kheng bet thei tawh lo pawh a ni thei; amaherawhchu, a lung kan tihawi lohva, amah aia ngaihsak leh hlauh zawk kan neih chang apiang hian Isua Krista chu kan lo kheng bet nawn leh thin a lo ni a. Heng kan han sawi tur mi pawimawh tak takte tihsual ang hian keini ringtute pawh hian Isua Krista hi kan lo

kheng bet nawn leh thin em tih i inngaihtuah teh ang u:

**1.1Juda Iskariota :** Tangka 30 hmanga Isua Krista hralhtu kha a ni a. A zirtir zinga a rin berte zinga mi ni thin khan eng vangin nge a zirtirtu chu a hralh leh si kan tih chuan, chhan dang dang awm mah se, a chhan bulpui tak chu tangka sum ngainat vang a ni. Keini, a tlan sate hian khawvel nawmsak thlakhlehna vang leh tangka sum ngainatna avangte hian Isua Krista hi kan kheng bet nawn ve fo thin ang em le?

**2. Rom sipaite :** A kheng bettute an ni a. Isua Krista kha amahah danglamna tak leh ropuina tak a awm a ni tih chu an hai lo; amaherawhchu, engati nge a kheng bettu berah an tan si kan tih chuan, amah an ngaihsak lohna vang a ni. Inngaihsak lohna hi sual langsar zinga kan chhiar si lovah chuan sual pawh tak a ni. Keini, a tlan sate pawh hian amah kan ngaihsak lohva, a thupekte leh a zirtirte ngaihthaha, amah nena inpawl na hun thawl kan neih theih loh fo avangte hian Isua

Krista hi kan kheng bet nawn ve fo th̄in ang em?

3. **Heroda** : Lal Heroda khan Isua Krista tihhlum vat vat a duhna chhan ber chu a hur vang a ni. A unaupa Philipa nupui Herodi a awmpui a. A thiltih tha lo sawiseltu Baptistu Johana chu a tihlum a. Isua Krista kha a aiawhtu nia a ngaih vang leh a thil lo hur sual tawhnate puang chhuak theitu tur nia a ngaih a ni. Keini, a tlan sate pawh hian kan hur sualna vang leh kan bawhlhlawhna avangte hian Isua Krista hi kan lo kheng bet nawn fo leh th̄in lo maw?

4. **Kaiapha** : Puithiam lalber Kaiapha hi Rom sawrkar awpna hnuaia Juda-te laka thuneihna sang tak chelh a ni a. Isua Krista hi mi thiltihthei tak a ni tih chu a hai lo va. A dam reng chuan sawrkara an hamthatna dawnte leh an ropuinate kha a lak heksak a hlau a ni.

Keini, a tlan sate pawh hian lalna leh thuneihna kan thlakhlelh luat avang hian Isua Krista hi kan lo kheng bet nawn fo ang em le?

5. **Pilata** : Pilata hi Palestina Governor a nih avang hian dan thlirna tarmit aṭang chuan Isua Krista thihna chungchanga mawhphurtu ber a ni. A hmaa Isua a lo inlan khan sualna nei lo leh itsikna vang mai maia phiar a ni tih a hre chiang em em a. Chuti chung sia eng vangin nge Isua Krista thihnaa mawhphurtu ber a nih si kan tih chuan, a dawihzep vang a ni. Keini, a tlan sate pawh hian mite hmaa Isua kan ṭan ngam lohva, a thupek zawm ngam lo khawpa kan dawihzep vang te hian Isua Krista hi kan lo kheng bet nawn ve fo th̄in ang em?

Hawh u, i inngaihtuah chiang teh ang u.



■ Hnung lam hawi tur leh hma lam en tura i hawi chhuah ngam loh lain, i th̄ian dik tak chu i bulah khan a awm reng ang.

— Mark Richardson

■ Nui teh, man a nei si lo va.

— King Elmswood

## Work Camp Report:

### Gurudayalpur

*Bial KṭP Conference-in work camp neih tura a lo rel tawh angin keini Vairengte Chhim Veng Bial KṭP chuan Gurudayalpur, Assam-ah Feb. ni 24-25, 2017 chhung khan work camp kan nei a. Ni 24.2.2017 (Zirtawpni) zing dar 9:30 velah Pastor Quarters kawt aṭangin kan chhuak a, Bialtu Pastor-in ṭawngṭaiin min thlah a ni.*

*Pathian hruainain tluang takin kan kal a. Bagha Pastor Quarters-ah ding thlain Bialtu Pastor, Rev. Jayanta Marak hovin work camp neihna hmun tur Gurudayalpur kan pan a. Chawhma dar 11:00 velah Gurudayalpur chu kan thleng a. Rev. Marak-a'n ṭawngṭaina hun a hman zawhin hna ṭan nghal a ni a. A ṭhenin biak in sakna hmun tur ban khur kan lai a, ban khur hi pariat laih a ni. A ṭhenin biak in sakna tur bungrua kan thiar bawok a. Chhun lamah balu, rora, rod, cement leh brick-te kan thiar a, zan lamah pawh generator hmangin light kan chhi a, brick thiar chhunzawm a ni bawok.*

*A tuk lamah hna chhunzawm a ni a. In sakna bungraw thiar leh biak in kawt turin chhak lam kopang laih a ni a, hlawhfaten an ban phun hna an ṭan a, hei hi a ṭhenin kan pui bawok a ni. Chawhma lamah hna hi kan zo va, Bialtu Pastor Rev. Marak-a'n arsa sawhchiar tui tak min buatsaihsak kan ei hnuin Biak In tlangah Evan. Ngirthoiliana Hrangkhoh-in ṭawngṭaiin min thlah a, hemi hnu hian kan khaw lam panin kan haw a, tlai dar 3 velah tluang takin Vairengte kan thleng leh a ni.*

**ṬUL DANG :** *Work camp-ah hian member 54 zet kan kal a, riak lut hi mi 30 kan ni. Pu Parimal Nath-a inah kan thleng a, mikhualte min duhsakin min duat hle mai a, an chungah kan lawm hle a ni. Biak in hmun pawh hi an chhungkuain an pek a ni a, Gurudayalpur Kohhran-ah hian anni hi a neitu chan chang ber a tih theih awm e. Tin, Bialtu Pastor bakah Bagha leh Kalahor Mohanpur-a Evangelist awm pathum ngawt maiin kan hnathawh chhung zawng min ṭawiawm a, an chungah kan lawm hle bawok a ni.*

— David Lalawmpuia, Secretary  
KṭP, Vairengte Chhim Veng Bial



## HRINGLANG TLÁNG

### *Ka pa thurawn min pek*

*Ka pa chuan mi a infiampui peih kharwp mai a, ball invarwm tawna lo man chu kan infiam dan ber a ni. Ka thiam lua lo nain infiam chu ka peih ve kharwp mai a, ball man awm tak tak pawh ka man thelh fo thin a; chutianga ka man thelh apiang chuan ka pa chuan, "Ngun takin ball kha en rawh," tiin min fuih thin a.*

*Ka lo thang lian zel a, naupang infiamna ang chuan kan infiam reng lem lo. Harsatna leh buaina ka neih changa thurawn la tura ka pa ka pan apiangin, ka pa chuan mi a infiampui laia min fuihna thu, "Ngun takin ball kha en rawh," tih barok kha fiamthu titihin a sawi thin a; min fuihna thu chu ka harsatna thu chin fel nan tangkai lo mah se, ka pa chuan a mi fuihna phenah chuan harsatna kârah pawh nui thei turin min duh a ni tih ka hria.*

*Kum 23 ka nih kum, kum 1995 khan ka pa chu na takin a damlo ta a. Thisen sang a neih avangin a zeng titih a, biak pawh a biak hleih theih tawh meuh loh. A fawng chhuak thei tawh lo va, a sawi duh chu hmui phunin a sawi thin. A tir lamah chuan a thusawi chu kan hre fuh hlei thei lo va.*

*Amah ka biak hnuhnun ber tum chuan ka bialpa nen kan inkâra harsatna thu ka sawipui a; chumi tum pawh chuan a hmui phun atangin a thusawi chu, "Ngun takin ball kha en rawh," tih a la ni cheu mai!*

*Ka pa khan harsatna kârah pawh nuih theih hi hnehna a ni tih hre turin min duh hle a ni ang tih ka ring.*

— Jackie Sagner

RIMAWI ■■■

**REH, RI LEH MUSIC**

— *Lalsiamkima*  
*Kanan Veng, Aizawl*

REH hi awm ta lo se, RI hi ri a ni tih kan hria ang em? "Ri siamtu chu reh hi a ni," ti ila kan pawm zawng a ni ang em? Reh hi eng ang chiahin nge kan ngaihhluta, engtiang chiahin nge kan hman t̄angkai t̄hin? Mother Teresa chuan heti hian a sawi:

*"We need to find God, and he cannot be found in noise and restlessness. God is the friend of silence. See how nature - trees, flowers, grass - grows in silence; see the stars, the moon and the sun, how they move in silence.... We need silence to be able to touch souls."*

Mi tam tak chuan reh hi Pathian biak nan leh Pathian aw hriat nan an lo hmang t̄hin. Chinese philosopher pakhat Lao Tzu chuan, "Reh hi chakna hnar a ni," (*Silence is the source of strength*) a lo ti baw.

**REH LEH MIZO** : A tlangpuiin Mizote hian Pathian kan hmuha, A aw kan

hriat theih nan ri pangngai mai duhtawk lovin, ri ring tak, thin nghawr dawt dawt thei khawpa ring kan duh t̄hin. Piangthar kan da leh hma t̄hin lutuk te hi thawm/ri ring tak kara piangthar kan nih t̄hin vang a ni thei mai ang em?

Kohhran hrang hrang Pathian biak inkhawmah hian reh hian hmun a chang tlem mai pawh ni lovin, a chang lo tawp zawk ti ila, kan sawi sual lutuk lo vang. Minute 1/2 vel han reh t̄hap te hi kan ngaithei lo va, kan awm thiam lo tlat. Laklawh thila second 20 vel te a han reh hian kan phawk hru a, "Engati nge, eng thil nge lo thleng...?" tiin kan beng kan chhi a, kan mit kan len ruai t̄hin. Tin, inkhawm hruaitute pawh hian reh hi pumpelh hram an duh t̄hin niin a lang. Reh a awm dawn chuan eng emaw tihrik tur an ngaihtuah a, reh tihbo nan hla sak ho tur te an thlang leh ringawt t̄hin. A nawlpuiin reh hmang thiam lo hnam kan nih hmel hle mai. Mi t̄henkhat chuan reh hi kan hlau a ang hle t̄hin baw. Hetih rual hian mitthi sun nan minute khat (1 min.) hun reh kan hmang t̄hin hian

reh zahawmzia leh khun-khanzia a tilang.

Reh hi eng hunah nge a lo thlen thin? Vanram hi eng tik lai pawha Pathian fakna ri fawn vel reng anga ngaih a ni a. Mahse, reh a thleng ve ngei tih chu Bible (Thupuan)-ah kan hmu. Chhinchhiahna Pasarihna phelh a nih laiin dar chanve lai van a reh thup mai a nih kha. He leiah pawh hian reh a lo thlen hun hi hun pawimawh lai ber a ni fo mai. Rik reng rikngawt hi chu a tha ber lem lo a ni ang, Bible-ah pawh hetiang hian kan hmu:

*"Mi â pawh hi a ngawih reng chuan mi finga chhiar a ni a, A hmui a chip chuan mi remhriiaa ngaih a ni" (Thufingte 17:28).*

*Mi â chuan a thinur thu zawng zawng a sawi chhuak a, Mi fing erawh chuan an thup a, an ngawihpui thin.*

*(Thufingte 29:11)*

**REH LEH MUSIC :** Music awmzia hrilhfhiahna tam takah chuan music hi "hunbi dika ri" tih a ni. Ri mumal, hunbi neia lo ri chhuak, ngaihlthlak nuam tak hi music hrilhfhiahna tlanglawn ber a ni. Hetih rual hian reh pawh hi music a ni, tia sawi a ni baw. Reh hi

music siamtu ber chu a ni, an ti. Hla (music)-ah hian a reh lai (thaw lak hun lai te) hi paih bo ta vek ila, chawl lovin music chu ri ta reng mai sela, music-ah kan la ngai thei ang em? Music teacher pakhat chuan, *"Music chu reh kara solfa note dah zeuh zeuh hi a ni,"* a ti. Hemi letling chiah hian French composer lar tak Claude Debussy chuan, *"Music chu solfa note ri inkara a reh lai hi a ni,"* (Music is the silence between the notes) a ti thung. Tin, John Cage-a music phuah pakhat 4'33 (4 minutes & 33 seconds) pawh a bul atanga a tawp thlengin reh vek a ni a, orchestra (musician rual)-in concert hall-ah an rem ve fo thin!

Music ri ruai ruai vawileh-khata a han reh thuap hian eng nge lo awm leh tur tiin kan beng min chhit zualtir thin a, a reh rei poh leh thil lo thleng tur chu kan nghakhlel zual sauh thin. Chutih hun lai tak chu thu pawimawh puan chhuahna hun tha ber a ni, an lo ti. Music ni kher lo, thil dangah pawh a ni, reh thuap a awm reng reng hian eng emaw lo thleng leh tura beiseinaah min hruai lut thin.

Thuhriltu thenkhat pawhin, "Thu pawimawh chu zawi tea sawi tur, mipuiin kan thusawiah an beng an chhit ngun phah thin avangin," an lo ti bawk.

Music-ah hian reh hi 'ri lo' satliah a ni lo va, music ve tho a nih avangin thu tam tak puang chhuaktu a ni. H. Lama hla phuah "Lalberte Lalber"-ah pawh khan a hla vawrtawp leh ropui lai ber chu a reh lai kha a ni. Conductor thenkhat chuan he hlaa reh a lo awm lai hian solfa an vai kal reng thin. Mahse, ka ngaih dan chuan he rehah hian solfa vai chu sawi loh, thil eng mah, che reng reng a awm tur a ni lo, na tak leh khunkhan taka reh a nih avangin. Ri hriat tur awm lo mah se, thinlung lamah reh hian nasa takin thu a sawi a ni.

Upa Lalrinmuana paper buatsaih pakhat, "Music" tihah chuan hetiang hian a inziak:

*"Fur khaw thiangan van dumpawl a lang thiangan kuk mai te, thlasik laiin thlasik kawng a paw chuai mai te, thalah romei a zam paw chek mai te hi music mawi tak lo chhuahna zu ni tlat thin a. Chutiang zelin hmangaihna te, thihna te,*

*thlaphanna te, hlahna te, lawmna te, pangpar mawi tak leh huan mawi tak mai te hi anmahni atang chuan ri reng reng hriat tur a awm lo; mahse, chung chu music mawi leh hlu ber ber lo pian chhuahna atana thil pawimawh leh nghahchhan a ni si."*

Hlaah hian a tlangpuiin thaw lak hun dik a awm a, hei hi zai hruaitute leh zaia rawngbawl thinte hian kan ngaih pawimawh zual a tul hle. Hla thenkhatah chuan thaw lak hun remchang tak, mahse, thaw lakna tur hun dik ni si lo a awm thin. Chutiang bawkin thaw lakna hun remchang lo tak, mahse, thaw lakna tur hun dik ni si a awm thin. Hetiangah hian mahni inthunun (discipline) a ngai zual a, taihmak a ngai hle bawk. Thaw lak hun dik hi ngai pawimawh lovin zawm lem lo mah ila, mawi tak leh nung takin a zai theih tho. Mahse, thaw lak hun dik hi music-ah chuan a pawimawh a, conductor tha (professional) te pawhin zaipawlte hla an zirtir hmain, thaw lak dan tur leh thaw lak hun turte hi an lo zir chiang (analyse) hmasa fe thin. Tin, orchestra

(instrumental music)-ah pawh music instrument-te tan thaw lak hun hi a awm a, ngaih pawimawh a ni bawh.


**Khah khawmna** : Music hi mihring rilru ang a ni a. A changin mihring chu kan lawm a, kan hlim a; a changin kan lungngai a, kan tap bawh thin. Thlamuang taka awm chang te, hlauthawng taka awm chang te kan nei thin. Bangbo taka awm chang te kan nei a, kan nunah phurawm leh huphurhawm tih em em chang te kan nei

bawh thin. Hetiang nun hrang hrangte hi music hmanga kan puan chhuah dawn chuan "Elements of Music" (melody, rhythm, dynamics & tone colour) te pawimawhzia kan hre thiam thei ang. Beng dar puak keh thei khawpa ri ring em em te, ngaihlak nuam tawh chauhva ri te, zawi tea ri te, zawi em ema ri te, hriat theih loh khawpa zawi te, reh vung vung te hi music tinungtu leh awmzia neihtirtu a ni.



### SYNOD CHOIR RAWNGBAWLNA

1. **ZOTLANG BRANCH** : May 8, 2017 khan Zotlang Branch KTP Zaipawl Night hmanpuuin vaw 3 dinah hla 8 an rem. Director Pu K. Lalruatpuian report pein inhmelhriattirna hun a hmang a, NL. Rammuanpuuin zaipawl testimony a pe a, NL. K. Lalrampani a solo bawh.
2. **LAMCHHIP BRANCH** : May 13, 2017 khan Lamchhip Branch diamond jubilee hmanpuuin, vaw 3 dinah hla 5 an rem.
3. **NEICCYA** : North East India Christian Council Youth Assembly Biennial Conference vaw 17-na (May 19-21, 2017), Diwon Presbyterian Church (Ribhoi Synod)-ah vaw 3 dinah hla 3 an rem.
4. **KAWNPUI DINTHAR KOHHRAN** : May 27, 2017 khan Kawnpui Dintar Biak In thar hawnnaah vaw 2 dinah hla 4 an rem. Biak In thar hi Executive Secy. Rev. B. Sangthangan a hawng a ni.
5. **CHHINGA VENG EAST** : May 29, 2017 zan khan Chhinga Veng East Branch-ah Zaipawl Night hmanpuuin vaw 3 dinah hla 8 an rem. Director Pu K. Lalruatpuian report pein inhmelhriattirna hun a hmang a, NL. Lalthlanlianin zaipawl testimony a pe a, Tv. Lalremsanga a solo bawh.



# KANTU

Kelsih Branch

**K**ristian Ṭhalai Pawl, Kelsih Branch hi July ni 13, 1954 khan din a ni a. Tunah hian kum 63-na kan hmang mek a. July ni 13, 2014 khan kan Branch kum 60-na (Diamond Jubilee) CKṬP Leader te nena hun lo hman tawh a ni a. Hemi hunah hian Souvenir te siamin, hruaitu hlui chawimawina leh Jubilee meichher deta programme hlimawm tak hman a ni. Min hruaitu Pathian hnenah lawm thu kan sawi nghal bawk e.

Kum 2017-ah hian member 199 (mipa 126 leh hmeichhia 73) kan ni a, Branch Committee member, Kohhran aiawh leh Bialtu Pastor nen 28 kan awm. Committee hi thla tin Ningani zan hnuhnung berah kan ṭhu ṭhin a ni. Kum 2017-ah hian missionary 11 kan chawm a, member aṭanga missionary-a chhuak hi pahnih kan nei mek

bawk. Tin, Kristian Ṭhalai chanchinbu hi copy 55 kan la mek bawk a. 2017 Branch Project atan Kohhran Zaipawl Music Video siam leh Bial pawn tlawh a ni a. Tunah hian kan project hlawhtlin theih nan hian hma kan la mek a, Kohhran Biak In sa lai kan nih avangin biak in sakna lamah tha leh zung a tam thei ang ber sen hi kan Branch thupui pakhat a ni bawk a ni. Branch sum tuak nan hian Faith Promise bakah blanket su, thing thiar, RCC slab chhunga inhlawh ṭhin a ni.

Branch Committee hnuaiah Sub-Committee pali (4) Evangelical Sub-Committee, Programme Sub-Committee, Refreshment Sub-Committee leh Kum Puan Sub-Committee te kan nei a, anni hian chak takin hma an la ṭhin a ni. Kuminah hian Group pali – Matthaia Group, Marka

Group, Luka Group leh Johana Group Chanchin Tha bu lite behchhana hman a ni. Kumin chhunga Group budget atan ₹ 18,000/- a ni a, thla tin Thawhtan zan inkhawm hnunung berah Group budget hi lak khawm thin a ni. Biak in hawnga nupui/pasal nei te, missionary leh Pathian thu zira chhuak an awm tein lawmpuina, citation leh present pek thin a ni a; Kohran Committee leh KTP member boral an awmin ralna thilpek kan hlan thin baw.

Kum 2017 chhunga kan Branch kum puan 'Inkhawm uara kal hma kum' bawhzui nan Kum Puan Sub-Committee-in inkhawm apiangin dar rik atanga minute 10-a thleng hman member-te an record thin a, kum tawpah lawmman inpek thin a ni baw. Tin, Kum Puan Committee hmalaknain Bible chhiar chhuakte hnenah

lawmman an pe thin baw. Evangelical Sub-Committee hmalaknain Pathianni tlai vawi thumna apiangah tawngtai rual leh sharing-a hun hman thin a ni.

Central KTP leh Bial KTP-ten bawhzui tura an tihte Pathian hruainain tha takin kan tihlawhtling thei a. Presbytery leh Bial huap thiltihah Branch item hrang hrang kan tihlawhtling thei thin baw. Kohran Zaipawl hi kan chakna bulpui pakhat niin member thahnem takin hla kan rem thin a, zaipawl nung takin kan kalpui mek a ni.

KTP Day, Branch Rising Day leh Advance Christmas-te kan phak tawkah ropui takin kan hman thin a, field lam leh biak in lamah intihsiakna hrang hrang nen hun hlimawm tak hman thin a ni a, member-te tisa leh thlarau lamah kan hlawk thei hle.



- *I hna i nin thu i sawi hmain hei hi ngaihtuah hmasa teh – hna nei lo leh taksa harsatna vanga thawk thei lo tam tak an awm, tih hi.*
- *Rilru hah vanga i indawmkun hmain hei hi ngaihtuah hmasa teh – i la dam alawm! Chuvangin, hlim takin nui la, lawm thu sawi ang che.*

# Keimahni



■ **HLIMEN BIAL** : April 29, 2017 (Inrinni) nileng khan Hlimen Bial huap Leadership Training, Hlimen Kohhrana neih hmanpuiin Pu Vanlalpeka (Finance Secy.) leh NI. Lalfamkimi-te an kal. Chawhma lam hun hnihah thenin Leadership training neih a ni a, chawhnu lam pawh hun hnihah bawh thenin Account training neih a ni. Tlaiah a kal zawng zawngte tan ruai buatsaih a ni a. Zan inkhawman Pu Vanlalpekan thuchah a sawi.

■ **REIEK BIAL** : May 6, 2017 khan Reiek Bial Leadership Training (Reiek Kohhran) hmanpuiin Upa Rosangliana leh Pu F. Lalremruata-te an kal. Inrinni nilengin training neih a ni a, chawhma lam hun Pu F. Lalremruatan a hmang a, chawhnu hun Upa Rosanglian a hmang, member 45 an tel. Inrinni zan kohhran inkhawmah Pu F. Lalremruatan thuchah a sawi bawh.

■ **MADANRTING BIAL** : May 13-14, 2017 khan Madanrting Bial Leadership Training (Madanrting Kohhran) hmanpuiin Pu Zonunsanga Ralte (Treasurer) leh T.Upa Zomuana Raltete an kal. May 13 (Inrinni) nilengin training neih a ni a, chawhma lamah Pu Zonunsanga Raltein hun a hmang a, chawhnuah T.Upa Zomuana Raltein a hmang, training-ah hian member 47 an tel a ni. Inrinni zanah Happy Valley Kohhranah T.Upa Zomuana Raltein thuchah a sawi a, Pathianni chawhnu inkhawmah Madanrting Kohhranah a sawi bawh. Zan inkhawmah Pu Zonunsanga Raltein thuchah a sawi.

■ **LAMCHHIP BRANCH** : May 13, 2017-ah Lamchhip Branch diamond jubilee lawmna hmanpuiin Pu K. Lalruatpuia leh T.Upa H. Ramnunsanga-te an kal. Chawhma inkhawmah T.Upa H. Ramnunsangan thuchah a sawi a, Pu K. Lalruatpuian jubilee lawmpuina thilpek a hlan. Hruaitu hlui chawimawina leh jubilee denchhena lawmpuina an siamte CKTP hruaitute hian an hlan bawh. Tlaiah ruai theh a ni.

■ **NEICCYA BIENNIAL CONFERENCE 2017** : North East India Christian Council Youth Assembly (NEICCYA) Biennial Conference vawi 17-na chu May 19-21, 2017 chhungin Diwon Presbyterian Church, Ribhoi Synod-ah nghah a ni a. Mizoram KṛP Unit aṭangin CKṛP Hruaitute (Pu P.C. Biakmuanpuia, NEICCYA Secretary telin) 14, Bial aiawh 13, Mizoram Synod Choir 25, an vaiin palai 52 an kal thei. Tv. Robert Lalduhzuala (CKṛP Com. member) chuan Bible reading & prayer hun a chang a, hruaitu thlan thar zingah Dr. David C. Vanlalfakawma telin Finance Secretary chanvo a chelh ang. Mizoram KṛP aṭangin Synod Choir an kal bakah KṛP, Shillong Branch ten special item (Live band) an thawh bawk. Thurel hrang hrang zingah Mizoram KṛP agenda, Restoring Communal Harmony and Church Unity tih chu pawm a ni a, NEICCYA Executive Committee bawhzui tura dah a ni. NEICCYA Biennial Conference vawi 18-na (2019) chu Presbyterian Independent Church, North East India (PICNEI)-in an thleng ang a, a hun tur erawh la ruat chawp tur a ni ang.

■ **CHOIR CABIN CHEIBAWL CHUNGCHANG** : Choir Cabin sira pindan ruak cheibawl kan dilna, OM-a kan thlen, Synod Trust Committee ngaihtuah tura dah chu Synod Trust Committee (STC 7:12)-in Synod Choir-ten a ṭul apianga an hman ṭangkai theih tura cheibawl remtih a nih thu Executive Secretary i/c Synod Trust, Rev. P.C. Pachhunga hnen aṭangin kan dawng (MS/STC-7/2017/31).

■ **PYF CONFERENCE NGHAHNA ATAN MISSION VENGTHLANG KOHHRAN** : October 20-22, 2017 chhunga CKṛP-in Presbyterian Youth Fellowship (PYF) Biennial Conference (2017) kan thlen tur, a hmun atan Mission Vengthlang Kohhran Biak In kan dilna chu remtih a nih thu Mission Vengthlang Kohhran Secretary Upa C. Zosangliana hnen aṭangin kan dawng.

#### ■ **BRANCH DING THAR**

1. Bungtlang South Pastor Bialah KṛP, Saibawh Vengchhak Branch, April 9, 2017-ah din a nih thu leh member 32 an awm thu report kan dawng. Registration fee Rs. 50/- an pe bawk.
2. Zemabaw North Pastor Bial chhungah April 27, 2017 khan Field Veng Branch, Zemabaw North a din thu leh member mipa 132, hmeichhia 69, an zavaiin 201 an nih thu report kan dawng a, Registration fee Rs. 50/- an pe bawk.



**Kantu – Kelsih Branch**

**CENTRAL K.T.P. HRUAITUTE, 2016-2018**

**Office Bearers**

|                 |   |                      |            |
|-----------------|---|----------------------|------------|
| Leader          | : | Rev. Zothansanga     | 9436365426 |
| Asst. Leader    | : | T. Upa Ngurhminglana | 9436374104 |
| Gen. Secretary  | : | Upa Zonunmawia       | 9436152024 |
| Asst. Secretary | : | Pu P.C. Blakmuanpuia | 9436374833 |
| Treasurer       | : | Pu Zonunsanga Ralte  | 9402113038 |
| Fin. Secretary  | : | Pu Vanlalpeka        | 9436153728 |

**Committee Members**

|                            |            |                                |            |
|----------------------------|------------|--------------------------------|------------|
| Tv. Joseph Lalsangzuala    | 9436152063 | Pu Lalchhuanlana               | 9862364583 |
| Pu K. Lalruatpuia          | 8132813745 | T.Upa Lalrinawma               | 9436152297 |
| Pu Lalhnehzova             | 8119947974 | Pu F. Lalremruata              | 9862561961 |
| T.Upa H. Ramnunsanga       | 9436152320 | T.Upa Zomuana Ralte            | 8794722319 |
| NI. Lalfamkimi             | 9436365245 | T.Upa P.C. Lalropuia           | 9863144485 |
| Upa Rosanglana             | 9612166769 | Pu Lalmuanawma                 | 9436196515 |
| Dr. Lalrotluanga           | 9436153937 | T. Upa Ricky Lalrammawia Ralte | 9862387308 |
| Dr. David C. Vanlalfakawma | 9436156561 | Tv. Robert Lalduhzuala         | 9862368012 |
| Upa Lalmuanpuia            | 9436142398 |                                |            |

**Ex-Officio Members**

|                            |   |                              |
|----------------------------|---|------------------------------|
| Rev. Lalzuithanga          | - | Synod Moderator              |
| Rev. Lianhmingthanga Sailo | - | Synod Secretary (Sr.)        |
| Rev. B. Sangthanga         | - | Executive Secretary, i/c KTP |

Postal Regn. no. MZR/81/2015-2017  
RNI No. MIZMIZ/2009/29074



Madanrtng Bial Leadership training



Vairengte Chhimveng Bial workcamp @ Gurudayalpur

Printed and Published by Zonunmawia, Synod Office, Mission Veng on behalf of Kristian Thalai Fellowship  
Edited by Lalchuanliana and printed at Synod Press, Mission Veng, Aizawl, Mizoram. Copies - 39,300